

**O‘simliklar karantini nazoratidagi mahsulotlar uchun fitosanitar
sertifikatini berish tartibi to‘g‘risida
NIZOM**

1. Mazkur Nizom o‘simliklar karantini nazoratidagi mahsulotlar eksporti uchun fitosanitar sertifikatini berish tartibini belgilaydi.

2. Mazkur Nizomda quyidagi asosiy tushunchalar qo‘llaniladi:

o‘simliklar karantini nazoratidagi mahsulotlar — o‘simliklar, ularning qismlari, ekish materiallari, qayta ishlash mahsulotlari, o‘simliklar karantinidagi zararli organizmlarni olib o‘tuvchisi bo‘lib xizmat qilishi mumkin bo‘lgan mahsulotlar va yuklar;

fitosanitar sertifikat — eksport qilayotgan mamlakatning vakolatli davlat organlari tomonidan o‘simliklar karantini nazoratidagi mahsulotlarning har bir transport birligiga beriladigan va o‘simliklar karantini nazoratidagi mahsulotlarning o‘simliklar karantinidagi ob‘ektlar bilan zararlanmaganligini tasdiqlovchi hujjat.

3. Fitosanitar sertifikati Qoraqalpog‘iston Respublikasi, viloyatlar va Toshkent shahar o‘simliklar karantini inspeksiyalari (keyingi o‘rinlarda hududiy inspeksiyalar deb ataladi) tomonidan beriladi.

4. Fitosanitar sertifikatida belgilangan talablarga yuridik va jismoniy shaxslar tomonidan rioya etilishi O‘zbekiston Respublikasi Vazirlar Mahkamasi huzuridagi O‘simliklar karantini davlat inspeksiyasi (keyingi o‘rinlarda Inspeksiya deb ataladi) va hududiy inspeksiyalar tomonidan nazorat qilinadi.

5. Fitosanitar sertifikati O‘zbekiston Respublikasi hududidan o‘simliklar karantini nazoratidagi mahsulotlarni eksport qilishda ushbu yuklarni karantindagi va boshqa xavfli zararkunandalar, o‘simlik kasalliklari va begona o‘tlar bilan zararlanmaganligini tasdiqlash maqsadida beriladi.

6. Fitosanitar sertifikati talab etiladigan o‘simliklar karantini nazoratidagi mahsulotlarning ro‘yxati O‘zbekiston Respublikasi Vazirlar Mahkamasi tomonidan belgilanadi.

7. Inspeksiya yuridik va jismoniy shaxslar tomonidan fitosanitar sertifikatini olish uchun zarur bo‘lgan ma‘lumotlarni o‘zining rasmiy veb-saytida joylashtiradi.

8. Fitosanitar sertifikatini berish mazkur Nizomning 1-ilovasiga muvofiq sxema bo‘yicha amalga oshiriladi.

Fitosanitar sertifikatini berishga doir talablar va shartlar

9. Quyidagilar fitosanitar sertifikati berish uchun rioya etilishi majburiy talablar va shartlar hisoblanadi:

yuridik va jismoniy shaxslar tomonidan o‘simliklar karantini to‘g‘risidagi qonun hujjatlariga, jumladan karantin qoidalariga, shuningdek fitosanitar talablarga rioya etilishi;

o‘simliklar karantini davlat inspektori tomonidan o‘z vakolati doirasida yuborilgan zarur fitosanitar talablar bajarilishi bo‘yicha taqdimnomalarni bajarish, o‘simliklar karantini

ob'ektlari aniqlanganda o'simliklar karantini qoidalariga muvofiq o'rnatilgan cheklashlar va ko'rsatmalarga rioya qilish;

O'zbekiston Respublikasidan olib chiqilayotgan o'simliklar karantini nazoratidagi mahsulotlar xalqaro fitosanitar talablarga, savdo shartnomalarida (bitimlarida) nazarda tutilgan fitosanitar shartlarga javob berishi va O'zbekiston Respublikasi hududidan olib chiqilishi mumkin bo'lmagan o'simliklar karantini nazoratidagi mahsulotlar ro'yxatiga kirmagan bo'lishi;

O'zbekiston Respublikasidan olib chiqilayotgan o'simliklar karantini nazoratidagi mahsulotlar etishtirilgan hududda karantin holati e'lon qilinmagan bo'lishi;

O'zbekiston Respublikasidan olib chiqilayotgan o'simliklar karantini nazoratidagi mahsulotlarni import qiluvchi mamlakat hududiga O'zbekiston Respublikasi hududidan karantindagi zararli organizmlar kirib borish xavfi mavjud bo'lmasligi;

fitosanitar sertifikatini berish natijasida harakatlarni bajarish va (yoki) muayyan faoliyatni amalga oshirish, fuqarolarning hayoti va sog'lig'iga yoki o'simlik dunyosi ob'ektlariga hamda ularning yashash muhitiga haqiqatda xavf solmasligi;

fitosanitar sertifikatini olish uchun yuridik va jismoniy shaxslar arizani o'simliklar karantini nazoratidagi mahsulotlarni O'zbekiston Respublikasidan olib chiqish rejalashtirilgan kundan kamida 30 kun avval tegishli hududiy inspeksiyaga taqdim qilishi.

10. O'zbekiston Respublikasidan olib chiqilayotgan o'simliklar karantini nazoratidagi mahsulotlarni fumigatsiya qilish talab etilgan hollarda yuridik va jismoniy shaxslar fumigatsiya ishlarini o'tkazish uchun zarur bino va inshootlar bilan ta'minlaydilar.

Arizani ko'rib chiqish va fitosanitar sertifikatini berish yoki fitosanitar sertifikatini berishni rad etish to'g'risida qaror qabul qilish

11. Fitosnitar sertifikatini olish uchun yuridik va jismoniy shaxslar (keyingi o'rinlarda ariza beruvchilar deb ataladi) tegishli hududiy inspeksiyaga quyidagi hujjatlarni taqdim etadi:

fitosnitar sertifikatini berish to'g'risida mazkur Nizomning 2-ilovasiga muvofiq shakl bo'yicha ariza;

fitosnitar sertifikatini berish to'g'risidagi arizani ko'rib chiqish uchun yig'im to'langanligini tasdiqlovchi bank hujjati.

Ariza beruvchidan ushbu bandeda nazarda tutilmagan hujjatlarning taqdim etilishini talab qilishga yo'l qo'yilmaydi.

12. Ariza hududiy inspeksiyaga ariza beruvchilar tomonidan bevosita, pochta aloqasi vositalari orqali yoki elektron shaklda, ular olinganligi haqidagi xabarnoma bilan birga taqdim etiladi. Elektron shaklda taqdim etilgan ariza ariza beruvchining elektron raqamli imzosi bilan tasdiqlanadi.

13. Fitosnitar sertifikatini olish uchun hududiy inspeksiyaga taqdim etilgan hujjatlar ro'yxat bo'yicha qabul qilinadi, ro'yxat hududiy inspeksiyalar tomonidan hujjatlar qabul qilingan sana to'g'risida belgi qo'yilgan holda darhol ariza beruvchiga topshiriladi (yuboriladi).

14. Ariza beruvchilar tomonidan taqdim etilgan ariza barcha hollarda, toki vakolatli organ ularning ishonchsizligini isbotlamaguncha ishonchli hisoblanadi.

15. Ariza ko'rib chiqilganligi uchun:

10 kg gacha bo'lgan bir dona jo'natma (qo'l yuki) uchun eng kam oylik ish haqining o'n besh foizi miqdorida;

100 kg gacha yuk ortilgan bir transport birligi uchun eng kam oylik ish haqining o'n sakkiz foizi miqdorida;

500 kg gacha yuk ortilgan bir transport birligi uchun eng kam oylik ish haqining yigirma foizi miqdorida;

1000 kg gacha yuk ortilgan bir transport birligi uchun eng kam oylik ish haqining yigirma besh foizi miqdorida;

1000 kg dan ortiq yuk ortilgan bir transport birligi uchun eng kam oylik ish haqining ellik foizi miqdorida yig'im undiriladi.

Ariza ko'rib chiqilganligi uchun yig'im summasi Inspeksiyaning hisob raqamiga o'tkaziladi. Ariza beruvchi berilgan arizasidan voz kechgan yoki ariza ko'rib chiqilgandan so'ng fitosanitar sertifikatini berish rad etilgan taqdirda to'langan yig'im summasi qaytarilmaydi.

16. Hududiy inspeksiyalar arizani ko'rib chiqishda fitosanitar sertifikatini berishi uchun boshqa vakolatli organlar tomonidan beriladigan ruxsat etish xususiyatiga ega hujjatlarni olishi talab qilingan hollarda, ruxsat etish xususiyatiga ega hujjatlarni berish soddalashtirilgan tartibda "bir darcha" orqali amalga oshiriladi, bunda hududiy inspeksiyalar mazkur hujjatlarni yuridik va jismoniy shaxslarning ishtirokisiz mustaqil ravishda oladi.

17. Fitosanitar sertifikatini berish yoki berishni rad etish to'g'risidagi qaror ariza beruvchilar tomonidan ariza kelib tushgan kundan boshlab etti ish kuni davomida qabul qilinadi.

Hududiy inspeksiya fitosanitar sertifikatini berish yoki berishni rad etish to'g'risidagi qaror qabul qilingan sanadan e'tiboran bu haqidagi tegishli hujjatni bir ish kundan kechiktirmay ariza beruvchilarga berishi (yuborishi) yoki bunday hujjatni berish rad etilganligi to'g'risida uni yozma shaklda, shu jumladan, axborot tizimi orqali elektron shaklda xabardor qilishi shart.

18. Fitosanitar sertifikati maxsus raqamlangan, himoyalangan holatda mazkur Nizomga 3-ilovaga yoki 3 a-ilovaga muvofiq shaklda rasmiylashtiriladi.

Fitosanitar sertifikati berilgan kundan boshlab o'simliklar karantini nazoratidagi mahsulotlar O'zbekiston Respublikasidan importyor mamlakatga etib borgan kungacha amal qiladi.

19. Quyidagilar fitosanitar sertifikatini berishni rad etish uchun asos hisoblanadi:

fitosanitar sertifikatini berilishi uchun zarur bo'lgan hujjatlarning ariza beruvchilar tomonidan to'liq bo'lmagan hajmda taqdim etilganligi;

ariza beruvchilarning ruxsat berishga doir talablar va shartlarga muvofiq emasligi;

ariza beruvchilar tomonidan taqdim etilgan arizada noto'g'ri yoki buzib ko'rsatilgan ma'lumotlarning mavjudligi;

o'rganishlar, tadqiqotlar, tekshirishlar yoki boshqa ilmiy va texnik baholashlarning yakunlari bo'yicha asoslantirilgan salbiy xulosa olinganligi.

Ushbu badda nazarda tutilmagan boshqa holatlarda fitosanitar sertifikatini berishni rad etishga yo'l qo'yilmaydi.

20. Fitosanitar sertifikatini berishning rad etilganligi haqidagi xabarnoma ariza beruvchiga yozma shaklda, rad etish sabablari, qonun hujjatlarining aniq normalari va ariza beruvchi ko'rsatilgan sabablarni bartaraf etib, takroran ko'rib chiqish uchun hujjatlarni taqdim etishi mumkin bo'lgan muddat ko'rsatilgan holda yuboriladi (topshiriladi). Ariza beruvchi rad etish sabablarini bartaraf etib va hujjatlarni takroran ko'rib chiqish uchun taqdim etishi mumkin bo'lgan muddat fitosanitar sertifikatini berish rad etilganligi haqidagi yozma xabarnoma olingan kundan e'tiboran o'n ish kunidan kam bo'lmasligi kerak.

21. Ariza beruvchi fitosanitar sertifikatini berishni rad etish uchun asos bo'lgan sabablarni belgilangan muddatda bartaraf etgan taqdirda, hujjatlar takroran ko'rib chiqish, fitosanitar sertifikatini berish yoki uni berishni rad etish ariza beruvchidan rad etish sabablari bartaraf etilganligini tasdiqlovchi tegishli hujjatlar olingan kundan e'tiboran besh ish kuni ichida tegishli hududiy inspeksiya tomonidan takroran ko'rib chiqiladi. Ariza takroran ko'rib chiqilganligi uchun yig'im undirilmaydi.

22. Hujjatlarni takroran ko'rib chiqishda ariza beruvchiga ilgari yozma xabarnomada bayon qilinmagan rad etish sabablarining tegishli hududiy inspeksiya tomonidan keltirilishiga yo'l qo'yilmaydi, ilgari ko'rsatilgan sabablar bartaraf etilganligini tasdiqlovchi hujjatlar bilan bog'liq rad etish sabablarining keltirilishi bundan mustasno.

23. Fitosanitar sertifikatini berish rad etilganligi haqidagi xabarnomada ko'rsatilgan muddat o'tgandan keyin ariza beruvchi tomonidan topshirilgan ariza yangidan topshirilgan hisoblanadi va tegishli hududiy inspeksiya tomonidan umumiy asoslarda ko'rib chiqiladi.

24. Ariza beruvchi fitosanitar sertifikatini berishning rad etilganligi, shuningdek tegishli hududiy inspeksiya mansabdor (vakolatli) shaxsining harakati (harakatsizligi) yuzasidan belgilangan tartibda shikoyat qilish huquqiga ega.

Fitosanitar sertifikatini qayta rasmiylashtirish va dublikatini berish

25. Fitosanitar sertifikatini olgan yuridik shaxs qayta ro'yxatdan o'tganda, uning nomi yoki joylashgan joyi (pochta manzili) o'zgarganda, etti ish kuni davomida tegishli hududiy inspeksiya fitosanitar sertifikatini qayta rasmiylashtirish to'g'risidagi arizani, ko'rsatilgan ma'lumotlarni tasdiqlovchi hujjatlarni ilova qilgan holda topshirishi shart.

26. Fitosanitar sertifikatini olgan jismoniy shaxs davlat ro'yxatidan o'tkazilganligi haqida berilgan guvohnomada ko'rsatilgan familiyasi, ismi, otasining ismi yoki faoliyat ko'rsatadigan joyi o'zgargan taqdirda etti ish kuni davomida tegishli hududiy inspeksiya fitosanitar sertifikatini qayta rasmiylashtirish to'g'risidagi arizani, ko'rsatilgan ma'lumotlarni tasdiqlovchi hujjatlarni ilova qilgan holda topshirishi shart.

27. Fitosanitar sertifikati qayta rasmiylashtirilguniga qadar, uni qayta rasmiylashtirish to'g'risida ariza bergan yuridik va jismoniy shaxslar yoki ularning huquqiy vorisi (merosxo'ri) fitosanitar sertifikatini qayta rasmiylashtirish to'g'risida berilgan, qabul qilib olingan sanasi haqida tegishli hududiy inspeksiyaning belgisi qo'yilgan ariza asosida unda ko'rsatilgan harakatni va (yoki) faoliyatni amalga oshiradi.

28. Fitosanitar sertifikati qayta rasmiylashtirilganda tegishli hududiy inspeksiya tomonidan fitosanitar sertifikatlari reestriga tegishli o'zgartirishlar kiritiladi. Fitosanitar sertifikatini qayta rasmiylashtirish arizaga tegishli hujjatlar ilova qilingan holda hududiy inspeksiya tomonidan qabul qilib olingan ish kuni davomida amalga oshiriladi.

29. Fitosanitar sertifikatini qayta rasmiylashtirish uchun ariza beruvchilarning fitosanitar sertifikatini berish to'g'risidagi arizasi hududiy inspeksiya tomonidan ko'rib chiqilganda va fitosanitar sertifikati qayta rasmiylashtirib berilganda mazkur Nizomning 15-bandida nazarda tutilgan summaning yarim miqdorida yig'im undiriladi.

30. Hududiy inspeksiya fitosanitar sertifikati yo'qolgan yoki yaroqsiz holga kelgan taqdirda, yig'im to'langanligini tasdiqlovchi hujjat olingan kundan e'tiboran bir ish kunidan ko'p bo'lmagan muddatda fitosanitar sertifikatining dublikatini berishi shart. Hududiy inspeksiya tomonidan fitosanitar sertifikatining dublikatini berganlik uchun mazkur Nizomning 15-bandida nazarda tutilgan summaning yarim miqdorida yig'im undiriladi.

Fitosanitar sertifikatining amal qilishini to'xtatib turish, tugatish va uni bekor qilish

31. Fitosanitar sertifikatining amal qilishini to'xtatib turish, tugatish hamda uni bekor qilish «Tadbirkorlik faoliyati sohasidagi ruxsat berish tartib-taomillari to'g'risida»gi O'zbekiston Respublikasi Qonunining 22, 23 va 25-moddalarida nazarda tutilgan tartibda amalga oshiriladi.

Fitosanitar sertifikatlari reestri

32. Hududiy inspeksiya fitosanitar sertifikatlari reestrini yuritadi va ularni o'z rasmiy veb-saytlariga joylashtiradi.

33. Fitosanitar sertifikatlar reestrda yuridik va jismoniy shaxslar to'g'risida quyidagi ma'lumotlar ko'rsatiladi:

fitosanitar sertifikati berilgan yuridik shaxslar to'g'risidagi asosiy ma'lumotlar: nomi, ularning tashkiliy-huquqiy shakli, joylashgan joyi (pochta manzili), telefon raqami;

fitosanitar sertifikati berilgan jismoniy shaxslarning familiyasi, ismi, otasining ismi, joylashgan eri (pochta manzili), telefon raqami;

fitosanitar sertifikatining berilgan sanasi va raqami;

fitosanitar sertifikatining amal qilish muddati;

fitosanitar sertifikatini qayta rasmiylashtirishning asosi va sanasi, amal qilishini to'xtatib turish yoki tiklash;

fitosanitar sertifikatining amal qilishini to'xtatish uchun asos va sana;

fitosanitar sertifikatini bekor qilishning asosi va sanasi;

fitosanitar sertifikatini to'xtatib turish, tugatish, qayta rasmiylashtirish hamda bekor qilishning asoslari va sanasi;

fitosanitar sertifikati dublikatini berishning asoslari va sanasi.

34. Fitosanitar sertifikatlar reestridagi ma'lumotlar yuridik va jismoniy shaxslar uchun ochiq hisoblanadi hamda O'zbekiston Respublikasi Davlat bojxona qo'mitasining «Ruxsatnoma hujjatlari avtomatlashtirilgan axborot tizimi»ga «real vaqt» rejimida ikki ish kunidan kechiktirilmagan muddatda joylashtirib boriladi.

Yakunlovchi qoida

35. Mazkur Nizom talablari buzilishida aybdor shaxslar qonun hujjatlarida belgilangan tartibda javob beradilar.